

Regional News Unit AIR Aizawl
Friday, September 13, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma hovin sawrkarin support price a pek tur thlai thar palite lei dan tur ruahmanna thlir ho a ni.
- Ministry of External Affairs Joint Secretary B Shyam leh Central YLA hruaitute nimin khan Aizawl State Guest House ah an inkawm.
- Prime Minister Narendra Modia chuan Aviation Sector chu eibar zawna thang chak ber pawla India siamtu a ni a ti
- Haaryana Assembly inthlan leh Jammu and Kahsmir inthlan thawhthumna atana nomination thehluh hun chu nizan khan a tawp.

<><><>

CM

Chief Minister Pu Lalduhoma hovin a pisaah sawrkarin support price a pek tur thlai thar palite lei dan tur ruahmanna thlirin nimin khan sorkar hotu hrang hrang an thukhawm.

Sawhthing hi kum danga a kal thin dan angin open market a kalpui tur a ni a, hetihruah hian open market ah hian harsatna awm palh thei ve tho a nih avangin chutiang hun a lo thlen palha chet lak dan tur vawiin thutkhawmah hian sawi a ni a. Hmunphiah chungchanga hmalak tawh chin te pawh tarlan niin Mauchar khawtlangin an hmunphiah hralhna man an la dawn kim loh avanga harsatna an tawh mek pawh chinfel sak tha an tih thu thutkhawmah hian an sawi a ni.

He thutkhawmah hian Minister Pu Lalthansanga, Pu PC Vanlalruata, Pu F. Rodinglana leh Adviser to CM Pu TBC Lalvenchhunga leh Dr. KC Lalmalsawmzauva te bakah sorkar hotu pawimawh te an tel a ni.

<><><>

MGNREGA SOCIAL AUDIT

Serchhip District ah Mizoram Society for Social Audit and Transparency (MSSAT) hnuaia Social Audit Unit te chuan an Director Pi C.Laltleipuii hoin nimin atang khan social audit an nei a. Serchhip District chungah khaw 18 thlang chhuakin September 24 thleng audit hi an kalpui dawn a ni.

Pi C.Laltleipuii leh a thawhpui te hian nimin khan New Serchhip, Darnam leh Dinthar Veng te an tlawh a. Heng veng palia tlawmngai pawl YMA, MHIP, MUP leh a dangte nen audit hi neih a ni.

Kumin July ni 29 khan Rural Development Secretary hovin Mizoram chungah ni 100 inhlawhna MGNREGA hnuaia thingtlang mi te leh mi harsa zawkte tana hamthatnate leh hmasawna tur thil dang pawimawh te sawi ho niin, hma an lo lak tawh dan te thlirletna leh an hmachhawpte sawiho a ni a.

Hemi bawhzui hian social audit kalpui niin mipuiten MGNREGA hnathawh dan leh tangkai dan te zau zawka an hriat theih nan tlawmngai pawl te leh chanchinbumite he audit ah hian an tel a ni.

Rural Development Department hnuiaia hnathawh hrang hrangte langtlang tak leh mipui tan chhawrnahawm lehzuala kalpui a nih theih nan Social Audit Unit te hian MGNREGA, PMAY-G, NSAP hnuiaia hnathawh te an endik thin a. Vantlang rorel (Gram Sabha) kalflangin an hnathawhte chu kum khatah vawihnih Audit thin niin hei hi dik tak leh langtlang taka hnathawh a nih zel theihna tura hmalakna a ni.

Social audit neih mekah hian mipui rorelna Gram Sabha koh niin mipui te hnenah an dikna chanvo leh hna kalpui dan te hriattir an ni a, hriatloh avanga hamthatna dawng thei tur ni si lo dawng lo palh te hnenah hriattir an ni a, mipuiten lungawi lohna an neih te leh zawhfiah duh an neih te zawhfiahna hun hawn a ni.

Serchhip khawpui chhunga social audit neih mekah hian Serchhip BDO Pi F. Lalnisai leh official dangte bakah Village Council member te, tlawmngai pawl hruaitute leh mipuite an tel a ni.



SIALHAW PHC

Sialhawk Public Health Centre (PHC) in an centre-ah National Quality Certification an dawn nimin khan an lawm a, Deputy Govt. Chief Whip leh Tuichang bialtu MLA, Pu W. Chhuanawman a hmanpui.

He hunah hian MLA Pu W. Chhuanawma chuan thu sawiin a bial chhunga Sialhawk PHC in National huap meuha damdawiin tha tehnaa an lang pha chu lawmawm a tiin thawktute inpekna leh an thawhrimnate an fakawm a tih thu leh an chhuanawm a tih thu a sawi a. Mipui hriselna enkawltu pawimawh tak an ni tih hre reng chunga taima taka hna thawk zel turin doctor te, nurse te leh staff te a chah bawk a, Sialhawk PHC in an mamawh hrang hrang ngaihtuah dan kawng a zawn tur thu sawiin thil dang thlen an duh hunah biak pawh theih reng a ni tih a sawi bawk.

He hunah hian Dr. Lalramhluna, Sr. Medical Officer chu chairman a ni a, Sialhawk VCP leh Champhai DQM in thu an sawi bawk a. Solo, dance leh item dang chi hrang hrangin hun an hmang bawk a ni.



CHAMPHAI CONSUMER COUNCIL

Champhai District Bawrhsap Pu VL Remliana hovin District Consumer Protection Council thutkhawm vawikhatna chu nimin khan DC Conference Hall, Keifangtlangah neih a ni.

Pu VL Remliana chuan dan ang taka thil kalpui a nih theih nan mipuite dikna leh chanvo te chu inhrilh hriat leh inzirtir thar fo a tul hle a ni, a ti a.

He hunah hian Pu CC Sakhawliana DCSO Member Secretary chuan Council thil tum sawifiahin, District Consumer Protection Council thil tum ber chu District chhunga Consumer dikna chanvo tihmasawn leh humhalh a nih thu a sawi.

He hunah hian District Consumer Protection Council hmalakna tur leh thil tumte ngaihtuah ho niin, Consumer te chanvo hrang hrang humhalh leh tihhmasawn dan tur te pawh sawiho a ni.

District Consumer Protection Council hi sawrkar hriattirna angin kumin July ni 1 khan Deputy Commissioner Chairman-na hnuaiah din a ni a. He council-ah hian sawrkar department hrang hrang 12 bakah tlawmngai pawl hruaitute an tel a ni.

<><><>

UNLAWFUL ACTIVITIES

Unlawful Activities (Prevention) Tribunal, New Delhi chuan Sikhs for Justice (SFJ) pawl chu dan kalha pawl din a ni a ti a, Unlawful Activities (Prevention) Act, 1967 hnuaiah kum 5 chung chu dan pawnah hnawl a nih thu a puang.

<><><>

CYLA

Sorkar laipui Ministry of External Affairs Joint Secretary B Shyam leh Central YLA hruaitute nimin khan Aizawl State Guest House ah an inkawm a,

Kaladan Multi Modal Transit Transport Project kal mek bak ah Lawngtlai District Zorinpui-a insawmdawn tawna kal mek chungchang te sawiho.

Central YLA hruaitute chuan India Act East Policy chu tha an tih thu leh an support flat thu Joint Secretary hnenah hian an sawia, tuna insumdown tawna kalpui mekah erawh sawrkar in mumal zawka kalpui anih theih nan hmalakna nei thei se an duh thu an thlen a- Immigration check post siam te, Border Commercial Haat buatsaihte a hmalama hmalakna awm thei se an duh thu thlenin. India ram sawrkarin Border fencing kalpui a tum pawh an thlawp thu leh a tul hle ni a an hriat thu ansawi.

KMMTTP Lawngtlai leh Zorinpui inkar kawngchhia avanga harsatna tawh mek pawh sawiin, helai ram chhungah ram neitu compensation la dawng lo te pawh a hma lama pek annih theih hmalakpui turin an ngen bawk.

Pu Shyam, chuan Central YLA thu thlen te chu thil pawimawh tak mai leh tih makmawh anih thu sawiin, a tihhlawhtlin dantur zawn a ni ang a ti a. Central YLA chu helai project hlawhtlinna kawngah an pawimawh takzet a ni a ti a, Central YLA chu he Project a hlawhtlinnan dinhmun pawimawhtak luahtu a ni, a ti.

<><><>

TUIPUI FERRY

Lawngtlai leh Siaha inkalpawhna, Tuipui Ferry Marboat Lawngtlai lam kaina chu, kawng a chhiat avangin Motor tan tlan a hrehawm bakah, lirthei tan a him loh avangin, Lai Autonomous Dist Council CEM Pu C. Lalmuanthangan nimin khan a siamthat tir.

CEM chuan, Lawngtlai leh Siaha inkar fur ruahtui tam hun laia awlsam zawka inkal pawhna tur, Dr Beichhua, Siaha Bialtu MLA in, mipui leh lirtheia kal thinte tana tangkai taka an hman tur, Tuipui Ferry-a Marboat a dah chu lawmawm atih thu a sawi a, Lawngtlai lam kaina kawng a tha lo hle a, Lirthei a kalte tan a him lova, harsatna an tawk thin tih sawiin, vawiin khan helai hmun hi lirthei a zin thinte him zawk nan tiin an siam that tir a, atul ang zelin hmalak zel an tum thu asawi.

National Highway ah Lawngtlai leh Siaha inkar hi dar hnih leh a chanve atanga darkar thum vel tlan a nih laiin, Tuipui ferry paldang chuan Minutes 45 atanga darkar khat vel ah thlen theih a ni.

<><><>

PM

Prime Minister Narendra Modia chuan Aviation Sector chu eibar zawinna thang chak ber pawla India siamtu a ni a ti. Nimina Asia-Pacific Ministerial Conference on Civil Aviation, New Delhi-a neih a hawwnaah he thu hi sawiin Pu Modia chuan sawrkarin he sector kaltlang hian mipuite, hnam ziarang leh hausakna thlunzawm a tum a ti a. Mi khawsak laihawl middle class an pung a, hei hian aviation lamah mamawhna a ti sang chho zel a ni a ti bawk.

Delhi Declaration chungchang sawilangin International Civil Aviation Organization (ICAO) kum 80 tlin lawm nan 2nd Asia-Pacific Ministerial Conference on Civil Aviation thingkung sing riat phun a ni ang a ti bawk.

<><><>

ELECTION

Haryana Assembly inthlan leh Jammu and Kahsmir inthlan thawhthumna atana nomination thehluh hun chu nizan khan a tawp a. Vawiinah nomination thehluh te hi endik a ni ang. Haryana-ah hian September ni 16 thleng inhnuhdawh theih a ni dawn a. Assembly seat 90 luah khat turin October ni 5 ah vote thlak a ni ang. Jammua and Kashmir ah pawh nomination te vawiinah endik a ni ang a, tun thla ni 17 thleng inhnuhdawh theihna hun hawn a ni a. Thla leh ni 1 ah vote thlak a ni ang.

<><><>